

Jasna Duraković
Zastupnica SBB BiH

BOSNA I HERCEGOVINA
FEDERACIJA BOSNE I HERCEGOVINE
KANTON SARAJEVO
SKUPŠTINA KANTONA SARAJEVO
n/r Ministarstva za obrazovanje, nauku i mlade KS
Sarajevo, 19.11.2019. godina

Zastupnička inicijativa

Ovom prilikom upućujem **zastupničku inicijativu na razmatranje Ministarstvu za obrazovanje, nauku i mlade KS kao i Vladi KS**, da provede javne konsultacije/raspravu (nastavnici, direktori škola i Vijeće roditelja KS) oko eventualnog budućeg predlaganja **Zakona o zabrani upotrebe bilo kakvog uređaja s mogućnošću mrežnog povezivanja poput mobitela ili tableta u osnovnim školama u KS**, ili barem razmotri opciju donošenja zakonske odredbe (izmjene i dopune Zakona o osnovnom obrazovanju) kojom će se regulirati ovo pitanje i na izvjestan način ograničiti upotreba mobitela i drugih uređaja za vrijeme nastave.

Obrazloženje

Naime, ponukana nedavnim saznanjem da je u francuskom parlamentu usvojen Nacrt Zakona o zabrani korištenja mrežnih uređaja (mobiteli i tableti) u osnovnim školama, i poučena primjerima iz Švedske i Danske, gdje je već odavno na snazi ovakav Zakon, smatram da bi bilo krajnje neophodno i kod nas implementirati istu zakonsku odredbu. Ovo je jedan od reformskih poduhvata, koji bi itekako uticao na kvalitet nastave i nastavnog procesa u osnovnim školama. Naime, mnogobrojna istraživanja pokazuju koliko je prekomjerno korištenje mobitela, tableta i drugih tehnoloških uređaja štetno za djecu uzrasta od 6 do 14 godina, i koliko to smanjuje njihovu koncentraciju, produktivnost i motoričke sposobnosti da akceptiraju i primjene naučeno znanje koje se pruža u osnovnim školama. Dodatno istraživanja pokazuju, kako su učenici kojima se zabranila upotreba mobilnih uređaja na nastavi imali daleko bolje rezultate na testovima znanja. Pored toga, ovo se nužno mora riješiti na način da se ograniči korištenje mobitela (oduzmu se mobiteli za vrijeme nastave) kako se ne bi ometala nastava i kako bi proces učenja i sticanja znanja bio što kvalitetniji. S obzirom na činjenicu da su škole već potpuno tehnološki opremljene, te se ovi uređaji koriste u nastavnom procesu na satima informatike, to dodatno olakšava uvođenje ograničenja upotrebe ličnih mobilnih i drugih uređaja kod djece u osnovnim školama, koja često zloupotrebljavaju ovu mogućnost i ne poštuju nastavnika i nastavu, jer ne postoje pravilnici koji bi sankcionirali ovakve radnje. Također bi ova zabrana/ograničenje znatno smanjila statusne/klasne razlike među djecom (u pogledu jako skupih mobilnih uređaja koje neka djeca koriste od najranijeg uzrasta, dok druga djeca nažalost nemaju dovoljno novca ni za svakodnevnu užinu). Stoga vas molim da razmotrite ovo pitanje što hitnije i ozbiljno pristupite u rješavanju zbog dugoročne koristi za sve strane.

Zastupnica SBB u SKS

Doc. dr. Jasna Duraković